



**JUDICIAL SYSTEM MONITORING PROGRAMME**  
**PROGRAMA MONITORIZASAUN BA SISTEMA JUDISIÁRIU**

*Komunikadu Imprensa*  
*6 Marsu 2014*

**Komete krime abuzu seksuál ba menór arguidu hetan pena prizaun tinan walu**

Iha 3 Marsu 2014 Tribunál Distritál Díli kondena pena prizaun tinan 8 ba kazu abuzu seksuál ba menór, ne'ebé involve arguidu F hasoru lezada. Kazu ne'e akontese iha Distritu Liquisa.

Ministériu Públiku akuza katak iha 25 Janeiru 2013, maizumenus iha oras tuku 11:00 dadersan, arguidu bolu lezada atu ba hare be'e iha lavandaria. Fila husi lavandaria arguidu lori kedas lezada tama ba kuartu laran. Arguidu kous lezada sae ba kama leten no halo abuzu seksuál ba lezada. Aktu ne'e, kauza lezada sofre moras ba lezada nune'e, ikus-mai familia deskobre kona-ba krime ne'e.

Ministériu Públiku akuza arguidu kontra artigu 177 Kódigu Penál kona-ba abuzu seksuál ba menór.

Iha audiénsia julgamentu arguidu konfesa totalmente ba tribunál katak faktus ne'ebé konsta iha akuzasaun Ministériu Públiku nian loos hotu. Maibé arguidu mos deklarara katak nia arepende ba hahalok ne'e no promete sei la halo tan iha futuru.

Iha alegasaun finál, Ministériu Públiku husu ba tribunál promove agravasaun tuir artigu 182 alinea 1 pontu (a) Kódigu Penál, tanba iha wainhira akontesimentu vítima sei iha tinan 4 fulan 5.

Tuir alegasaun defeza ninia, husu ba tribunál atu aplika pena ne'ebé bele hakaman arguidu, tanba arguidu arepende ba ninia hahalok.

Depois avalia no konsidera faktus sira ne'ebé produz iha julgamentu ne'e, tribunál konklui prosesu ne'e hodi kondena arguidu ho pena prizaun tinan 8, la selu kusta judisial.

*JSMP louva desizaun ba kazu ne'e, no enkoraja tribunál atu konsidera krimé abuzu seksuál ba menór no violasaun hasoru labarik nu'udar krime ne'ebé grave no tenke kondena ho pena ne'ebé todan tuir gravidade krime ne'ebé arguidu komete,"* dehan Diretór Ezekutivu JSMP, Luis de Oliveira Sampaio.

JSMP observa katak, iha tribunál hotu kuaze kada semana ida ka rua julga kazu abuzu hasoru menór. JSMP preokupa teb-tebes ho realidade ida ne'e, JSMP bolu antensaun ba ema hotu liu-liu ba instituisaun relevantes sira hanesan Ministériu Justisa no Ministériu Solidaridade Sosial

atu institusionaliza mekanismu propoiu hodi proteje labarik no prevene violénsia seksuál hasoru labarik sira.

Kazu ne'e rejista iha tribunál ho Nú. Prosesu: 362/2013/TDD. Julgamentu prezide husi juisa Dra. Ana Paula Fonseca (rep. Juis kolektivu), Ministériu Públiku representa husi Dr. Hipolito Martins Santa no arguidu hetan defeza husi Dr. Cansio Xavier husi Eskritóriu Defensór Públiku.

Atu hetan informasaun kompletu, favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

[info@jsmp.minihub.org](mailto:info@jsmp.minihub.org)

Telefone: 3323883 | 77295795

Website: [www.jsmp.tl](http://www.jsmp.tl)

Face book: [www.facebook.com/timorleste.jsmp](http://www.facebook.com/timorleste.jsmp)

Twitter: @JSMPtl